

Chhiáⁿ Lāu-su Hō Hák-seng Chèng-khak ê Koan-liām!

Sin-chi

Góa chit-má thák tāi-hák 2-nî-á, siōng kòe chin chē lāu-su ê khò. Ú ê lāu-su siōng-khò siōng kàu chit-pòaⁿ, tō kóng “Lán Tiong-kok-lâng.....”, nā bô tō-sī kóng “Lán 5000-tang ê thôan-thóng.....”, piān-nā kóng tiōh “華陀”, tō kóng sī “我國的華陀.....”, chin chē lē, kóng bē liáu. Ú kúi-nā pái góa chiok siūⁿ beh giáh chhiú kā lāu-su kóng, “Lāu-su, lí beh chò Tiong-kok-lâng sī lí ê tāi-chì, m̄-koh góa sī 1 ê chin-chin-chiàⁿ-chiàⁿ ê Tâi-ôan-lâng, m̄-sī Tiong-kok-lâng.”

Góa chū sè-hàn tō chiāh Tâi-ôan bí, lim Tâi-ôan chuí, iōng..ê sī sin-tâi-phiò, m̄-sī “人民幣”, kóng góa sī Tâi-ôan-lâng bô jīm-hô m̄-tiōh. Iah ū lâng kóng lán ê chó-sian sī Tiong-kok-lâng, só-i lán mā-sī Tiong-kok-lâng. M̄-koh Tâi-ôan chit té thó-tē sī góa sêng-tiōng ê só-chāi, góa tui i ū kám-chêng, ū thiàⁿ-sioh ê sim, tui Tiong-kok put-tān bô jīm-hô ê kám-chêng, jī-chhiáⁿ liáu-kái Tiong-kok ê lèk-sú kap chèng-tī liáu-āu, hō góa koh-khah thó-ià Tiong-kok, in-chhú bô lâng ê-tàng pek góa ūi-pōe góa ê liōng-sim, kiò góa kóng ka-kī sī Tiong-kok-lâng; mā bô lâng ê-tàng bú-jiòk góa, kiò góa sī Tiong-kok-lâng!

Góa chai-iáⁿ, tāi-pō-hūn lāu-su lóng siū KMT ê tōa Tiong-kok i-sek éng-hióng, tān-sī tī chit-ê bîn-chú sī-tāi, chò lāu-su..ê kēng-ka ài chiong chèng-khak ê koan-liām kà hō ták-ê

hák-seng chai-iáⁿ. Chhin-chhiúⁿ “Tiong-kok” chit-ê kok-ka kin-pún tō-sī 1949 nî chiah sêng-lip..ê, lán Tâi-ôan chit-tè tō-sū bōk-chêng hō “Tiong-hôa-bîn-kok” chit-ê chèng-kôan thóng-tī, lán Tâi-ôan-lâng iáu bô ka-kī ê kok-ka, lán iû-gôan sī gôa-lâi chèng-kôan sit-bîn thóng-tī ê tui-siōng téng-téng ê koan-liām. Nā-sī lāu-su ū kā chiah-ê koan-liām kà hō hák-seng, góa siong-sìn bián jōa kú, lán it-têng ê-tàng kā “Tiong-hôa-bîn-kok” ián hō péng, khí-chō sin kok-ka!

Lêng-gôa koh ū 1 ê giâm-tiōng ê būn-tê, tō-sī gí-giân ê būn-tê. Lāu-su siōng-khò lóng iōng Pak-kiaⁿ-oe teh siōng. Ài chai-iáⁿ, Pak-kiaⁿ-oe tī lán Tâi-ôan m̄-sī èng-kai..ê, góa lóng chiong i tòng-chò sī goa-kok-oe lâi iōng. Tâi-ôan-lâng èng-kai ài thôan-kiat, kiōng-tông tui-khòng Pak-kiaⁿ-oe chiah tiōh. Góa kiàn-gī lāu-su chīn-liōng ê-tàng iōng Tâi-ôan-oe siōng-khò, án-ne lâi, ê-tàng hō hák-seng chiap-chhiok tiōh bó-gí ê ki-hōe, lán ê bó-gí iā chiah bē siau-sit--khì.

Góa chin ài góa ê lāu-su, tān-sī góa koh khah ài chin-lí. Tī thák-chheh ê kòe-têng tiong, góa ê put-tōan cháu-chhōe chin-lí, hi-bāng chôan-kok ê lāu-su chiong chin-lí kà hō hák-seng, mài hō hák-seng chhò-ngō ê koan-liām. Nā bô, siū-tiōh siong-hāi put-chí sī hák-seng, siā-hōe, sīm-chì sī kui-ê kok-ka!

